

FORSKRIFT FOR NAMNSETTING, ADRESSERING OG ADRESSEFORVALTNING I VOLDA KOMMUNE.

Med heimel i lov om eigedomsregistrering (matrikkellova) § 21 av 1 januar 2010 med tilhøyrande forskrift om eigedomsregistrering (matrikkelforskrifta) § 59 av 1 januar 2010 samt i lov om stadnamn av 18 mai 1990.

§ 1. Adresseemynde

Avdeling for kart- oppmåling og byggesak er kommunen sitt adresseemynde og har ansvaret for adresseforvaltninga i kommunen med tildeling av offisielle adresser etter reglane i matrikkellova og tilhøyrande forskrift. *Kultur- og næringsavdelinga* har ansvaret for saksførebuaende arbeid knytt til namnsetting og skrivemåte av stadnamn/adressenamn etter reglane i lov om stadnamn.

§ 2. Namnemynde

Forvaltningsstyret er kommunen sitt namnemynde, har ansvaret for namnsetting og gjer vedtak i skrivemåten av stadnamn/adressenamn etter reglane i lov om stadnamn. Namnemyndet er ansvarleg for å gi uttale på kommunen sin vegne om skrivemåten av stadnamn/adressenamn som kommunen ikkje har vedtaksretten for.

§ 3. Offisiell adresse

Med offisiell adresse meinast det:

vegadresse, angitt med vegnamn, adressenummer (husnummer) og eventuell bokstav,
eller:

områdeadresse, angitt av områdenamn, adressenummer (husnummer) og eventuell bokstav,
eller:

matrikkeladresse, angitt med gardsnummer, bruksnummer og eventuelt festenummer og/eller undernummer med tilhøyrande adressenamn. Til offisiell adresse kan også eit bustadnummer høyre med. Matrikkeladresse skal erstattast av veg- eller områdeadresse.

§ 4. Om adressemyndet og namnemyndet sitt arbeid.

1. Ved innføring av vegadresser lagar adressemyndet kartoversikt som viser dei einskilde adresseparsellar (vegar/område) med angitt start- og endepunkt og tildelte adressenummer (husnummer) etter reglane i "Handbok i kommunal adressesettdeling", del 1 og 2.
2. Namnemyndet vedtek namn og skrivemåte for dei einskilde adresseparsellar og eventuelle tilleggssnamn (namn på t.d. bustadfelt). Aktuelle foreiningar, lag og einskildpersonar i kommunen bør gjevast høve til å kome med forslag til namn.
3. For nye område/bustadfelt der vegadresser skal nyttast, bør opplegget for adressering og namnsetting skje samstundes med handsaming av reguleringsplan slik at ikkje "tilfeldige" namn kjem i varig bruk.
4. I område med matrikkeladresser vedtek namnemyndet adressenamn. Som hovudregel skal det nyttast gardsnamn for alle matrikkeladresser under dei einskilde gardsnummer og eventuelt tilleggssnamn. Gardsnamn kan utelatast dersom dette gir missvisande informasjon, men då skal eit anna namn nyttast.

§ 5. Retningslinjer for utforming av adressesystemet og nummerering av adressene.

1. Adressemyndet skal utarbeide tenlege adresseparsellar som skal ha som hovudmål å gjere det enkelt for alle å finne fram. Offisielle adresser er oppretta som ein del av infrastrukturen i kommunen. Namnemyndet har ikkje høve til å gjere endringar på adresseparsellane som adressemyndet har utarbeidd, men skal finne gode namn til desse.
2. Startpunkt for nummertildeling av adresser til veg eller område med eige adressenamn er normalt der vegen eller tilkomsten til området tek av frå overordna veg. Der ein adresseparsell (veg/område) har to eller fleire tilknytningspunkt til overordna veg, skal utgangspunktet for

nummereringa til vanleg vere det som ligg nærast utgangspunktet nemnt i nr 1, rekna i retning til ferdssåra.

3. Sidevegar til ein overordna veg bør gjevast eige adressenamn dersom sidevegen er:
 - a) Kortare enn 200 m og fører til minst 14 adresseeiningar.
 - b) Lengre enn 200 m og fører til minst 7 adresseeiningar.
4. Der adresseeiningane mest tenleg kan knytast til eit naturleg avgrensa område, bør området ha eige adressenamn dersom det i området er minst 20 adresseeiningar.
5. For å gjere det lettare å finne fram kan kommunen gjere unntak frå dei grensene som er sett i nr. 3 og 4. Unntak kan også gjerast dersom føremålet er å unngå større endringar i det etablerte adressesystemet. Det kan også takast kulturhistoriske omsyn ved namnsettinga
6. Det skal nyttast like tal på høgre side og ulike tal på venstre side av vegen sett frå startpunktet av vegen.
7. Nummereringa langs sidene til ein veg skal gå mest mogleg parallelt og det bør reserverast ledige nummer i tilfelle seinare utbygging.
8. Avstandsprinsippet vert nytta i området med spreidd busetnad. Her vert nummertildelinga rekna ut frå startpunktet til vegen rekna i 10-meter (ei adresseeining som ligg 400 m frå startpunktet av vegen, vert til dømes gjeve nummer 40).
9. Ein kan også nytte seg av kombinert tradisjonell adressering og adressering ut frå avstandsprinsippet.

§ 6. Skilting

1. Kommunen skal sette opp og halde vedlike vegnamnskilt og tilvisningsskilt for adresser med tilkomst frå fellesvegar som ikkje har eigne adressenamn. I tillegg skal kommunen i nødvendig omfang sette opp og halde vedlike kryssorienteringsskilt og andre opplysnings- og tilvisningsskilt som skal hjelpe ukjende fram til rett adresse.
2. Eigar/festar av eigedom som har fått tildelt offisiell adresse av kommunen, pliktar å koste, sette opp og halde vedlike husnummerskilt.
3. For eksisterande bygg/eigedomar som får tildelt adressenummer i vegadresse, skal nummerskilt vere sett opp innan eitt år etter at adressetildeling er gjort kjend. For nye bygg skal nummerskilt vere oppsett før bygget vert teke i bruk.
4. Adressemyndet skal føre kontroll med at ovannemnde reglar vert følgt og gi dei naudsynte pålegg.

§ 7. Plassering av skilt, materiale m.m.

1. Nummerskilta skal plasserast på ein måte som tydeleg fortel kva for bygg/eigedom dei knyter seg til. Skilta skal vere lett synlege frå gate eller veg, og haldast reine og heile med tydelege tal og evt. bokstavar.
2. Nummerskilt skal som hovudregel stå om lag 2,5 m over bakken, og så vidt mogleg til høgre for alle inngangsdører og innkøyrslar frå veg.
3. Der skilt vanskeleg kan sjåast frå vegen skal nummerskiltet plasserast i høveleg høgde på port, inngjerding, stolpe eller anna egna stad og som regel til høgre for inngang/innkøyring.
4. Vender nummerskiltet mot annan veg enn den adressa er knytt til, skal det under nummerskiltet monterast skilt som viser kva veg bygninga er adressert til.

5. Huseigar pliktar å sørge for at nummerskilt er godt synlege og at dei ikkje er skulte av tre, buskar, andre skilt m.m.

§ 8. Iverksetting

Desse forskriftene gjeld frå den dato den er vedteken i kommunestyret.

Denne forskrifta vart vedteken i Volda kommunestyret i sak. PS 48/10 den 29.04.2010


Ragnhild Aarflot Kalland
ordfører

ORDFØREREN I
VOLDA KOMMUNE